



Акафист

трем святителям Василию

Великому, Григорию Богослову

и Иоанну Златоустому

Кондак 1

Избраннии светильницы Церкви Христовы, Василие, Григорие и Иоанне, ученьми вашими мир просветившии и вся шатания ересей и хульных смущения угасившии; яко ходатаи спасения нашего суще, молитвами вашими сохраните ны от всяких бед и вечных мук, да с радостию благодаряще вопием вам:

Радуйтеся, трие святителие, велицыи и вселенстии учителяе.

Икос 1

Ангели земнии и человецы Небеснии, святителие Христовы и отцы треблаженнии, поборницы Живоначальныя Троицы, от Нея светом трисолнечным осияваемии и молящися непрестанно у престола Триипостаснаго

Божества о душах наших, услышите ны от сердца к вам взывающия:

Радуйтесь, имущии дерзновение вопити о нас ко Господу;

радуйтесь, велиции угодницы Святыя Троицы.

Радуйтесь, дарованьми единочестнии;
радуйтесь, апостолом единомравнии.

Радуйтесь, яко вашими ученьми дивно просия благодать Христова;

радуйтесь, разум свой в послушание веры пленившии.

Радуйтесь, блазии делателие винограда Христова;

радуйтесь, от юности Богом благословеннии.

Радуйтесь, скорби жития сего добре претерпевшии и данный вам талант приумножившии;

радуйтесь, волю Божию сильным мира сего со многим дерзновением благовестившии.

Радуйтесь, тьму нечестия отгнавшии;

радуйтесь, всю подсолнечную зарями догматов просветившии.

Радуйтесь, трие святителие, велицыи и вселенстии учителяе.

Кондак 2

Видя еретичествующих лютая стремления, меч острейший противу сетей лжеучений и огонь, плевелы суемудрия поядая, святой Василии явился и, яко пастырь изряднейший, обличив лесьть идольскую своим богодухновенным вещанием. Научи ны почитати Святую Троицу, разделену убо Ипостасьми, соединену же Существом, и вопити Ей: Аллилуиа.

Икос 2

Разум озарен благодатию Христовою имуще, яко апостолом единоправнии, православных догматов учения уясните и трие велицыи светильницы Триипостаснаго Божества явистесь; вашими бо вдохновенными писаньми озаряема, Церковь Христова светло красуется, и верная чада ея в меру возраста исполнения Христова восходят. Темже взирающе на богатство благодати Христовы, вам дарованныя, яко просветители наша восхваляем вы, вопиюще таковая:

Радуйтесь, богоноснии небеснии таинницы;

радуйтесь, покаяния немолчнии
проповедницы.

Радуйтесь, сосуди избраннии;
радуйтесь, премудрии учителяе вселенныя.

Радуйтесь, в Божественных учениих
Христовых люди наставившии;

радуйтесь, в повелениих Господних всегда
усердно ходившии.

Радуйтесь, многоразличных добродетелей
обряды в вашем житии явившии;

радуйтесь, столпи непоколебимии, веру
Христову Божественными догматы
утвердившии.

Радуйтесь, словесное стадо Христово мудре
упасшии;

радуйтесь, православия изряднейшии
богослови.

Радуйтесь, светила, вся концы земли
просвещающая;

радуйтесь, свирель и цевнице сладкозвучная.

Радуйтесь, трие святителие, велицыи и
вселенстии учителяе.

Кондак 3

Сила молений отчих понуди святого Григория Понт оставити и в Назианз ко отцу своему, помощи ради ему, преселитися, идеже славу Божию ученьми и дела вещаше и ересь арианскую посрамляше. Темже и нас, великий святителю Григорие, Божественнаго рая нетленныя проходя пажити, поминай у престола Святыя Троицы, да со умилением взываем Ей: Аллилуиа.

Икос 3

Имуще в сердцах светоносную благодать Святыя, Единосущныя и Нераздельныя Троицы, трие богопроповедницы, разделеннии телесы и совокупленнии духом, благочестно яве проповедаша Троицу Едину непременною, Существо же и Божество, и сию проповедь страданьми запечатлеша. Темже и мы, подражающе вере их, вопием таковая:

Радуйтеся, сильнии и непреборимии Церкви Христовы споборницы;

радуйтеся, истины Христовы усерднии ревнители.

Радуйтесь, ко Пресвятей Троице
молитвенницы теплии;

радуйтесь, Церкви Христовы пастырие
добрии.

Радуйтесь, Ариа низложившии и
православныя утвердившии;

радуйтесь, Троицу Едину Непременную,
Существо и Божество, деяньми и ученьми
прославившии.

Радуйтесь, Отца, и Сына, и Святаго Духа,
Троицы Ипостаси, дивно уяснившии;

радуйтесь, Трисиятельного ради и Единого
Божества величайшия скорби и гонения
претерпевшии.

Радуйтесь, тяготу дневную до скончания
своего жития неослабно понесшии;

радуйтесь, ночь мрачную злочестивых ересей
лучами богомудрых догматов отгнавшии.

Радуйтесь, души верных благодатно
напитавшии;

радуйтесь, Царствия Вечнаго наследницы
быти сподобившиися.

Радуйтесь, трие святителие, велиции и вселенстии учителяе.

Кондак 4

Бурю ярости и гнева воздвигоша, о Златоусте, безумнии людие, клеветуеще на тя и изгнати от царствующего града повелевающе. Ты же, Златослове, на камени веры Христовы непоколебимо пребывая и благодатию Святаго Духа укрепляем, бурю гонений и мучений мужественно претерпел еси и страданьми венец нетленный на Небесех себе уготовал еси, научая всех в терпении нести Крест Христов и взывати Богу: Аллилуиа.

Икос 4

Слышаще богодухновенная словеса ваша, запечатленная многими подвиги и страданьми, жаждущии глаголов жизни вечныя издалеча к вам прихождаху, и нетленную пищу от вас приемше и Божественнаго пития почерпше, взываху вам сицевая:

Радуйтесь, глубины слова Божия добре испытавшии;

радуйтесь, непрестанным рачением Бога взыскавшии.

Радуйтесь, алчущих правды питателие;
радуйтесь, нищих духом утешителие.

Радуйтесь, облацы, источающии росу учений
благочестивых и напаяющии вселенную;

радуйтесь, приснотекущая реки духовныя,
напаяющия верных чад Церкви Христовы.

Радуйтесь, Божественных Таин хранителие и
словесные трубы Божия;

радуйтесь, правыя веры и благочестия
христианскаго насадителие.

Радуйтесь, чудесы многими верныя
озаряющии;

радуйтесь, реки врачеваний нам
проливающии.

Радуйтесь, усердно притекающия к вам от
искушений и напастей молитвами вашими
охраняющии;

радуйтесь, всего рода христианскаго похвало.

Радуйтесь, трие святителие, велицыи и
вселенстии учителяе.

Кондак 5

Боготечную звезду Христос миру показа ты, великий во иерарсех Василие; стяжав бо ведение Божественных Таин и озарение свыше от Престола благодати Божия, умы и сердца верных богодухновенными словесы дивно просветил еси, любовью же к Богу одушевляем, гонения и страдания за Христа добре претерпел еси и сего ради сподобился еси на Небесех молитвеннаго дерзновения у Престола Царя Славы, образ быв верным словом, житием, духом, любовью, верою и чистотою, да вси со умилением вопиют Пресвятей Троице: Аллилуиа.

Икос 5

Видяще вас, святителие Христовы, Небесным ликостоянием присно спребывающия и Престолу Божию всегда предстоящия, со умилением воспеваем возвеличившую вас Живоначальную Троицу, Юже словом и житием вашим прославили есте, вам же, молитвенником изряднейшим, от любве сердечныя вопием:

Радуйтеся, горним ликом совокупления и святых ангел сожителие;

радуйтесь, Престолу Царя славы
предстоящий присно со всеми избранными.

Радуйтесь, славою небесною украшеннии;
радуйтесь, плоть и мир возненавидевшии.

Радуйтесь, вся сокровища мира и житейския
сласти Христа ради во уметы вменившии;

радуйтесь, на светозарную добродетелей
колесницу возшедшии и Небеснаго Царствия
достигшии.

Радуйтесь, и нам, грешным, образ
добродетелей словом и житием явившии;

радуйтесь, многими скорбьми вшедшии в
радость Господа своего.

Радуйтесь, теплии о нас пред Богом ходатаи;
радуйтесь, православнаго богословия светила
изряднейшая.

Радуйтесь, веры христианския похвало;
радуйтесь, святителей славо и Церкви
украшение.

Радуйтесь, трие святителие, велицыи и
вселенстии учителяе.

Кондак 6

Проповедуя истину боговещанными твоими глаголы, сокрушил еси, богослове Григорие, еллинская суемудрия и ересей соблазны, вселенней же всей немолчно проповедал еси в Троице славимаго Бога Единосущнаго, Отца и Сына и Духа Святаго, научая всех вопити Ему: Аллилуиа.

Икос 6

Возсиясте светом добродетельнаго жития и православныя веры исповеданием во всю вселенную и всем языком свет истиннаго богопознания уясните, якоже быти вам пастырем и учителем всея Церкви Христовы. Темже и по смерти не престаете приизирати на ны, тепле вам молящияся и взывающия:

Радуйтеся, три светила великая, путеводящая нас ко спасению;

радуйтеся, просветителие сидящих во тьме неведения.

Радуйтеся, недомысленныя Тайны Триипостаснаго Божества нам уясняющи;

радуйтеся, струями мудрых учений паству свою напаяющи.

Радуйтесь, пастырие изряднейшии, житие свое всякими добродетельми благоукрасившии;

радуйтесь, стадо свое от волков хищных соблюдшии.

Радуйтесь, светильницы трисолнечнаго света, умы и сердца верных дивно озаряющии;

радуйтесь, образы целомудрия, ревновати о стяжании сея добродетели нас научающии.

Радуйтесь, церковная кормила, путь православнаго боговедения ясно показующая;

радуйтесь, дванадесяти апостолом единоправнии.

Радуйтесь, ангельских ликов сожителие;

радуйтесь, купно со всеми святыми непрестанно молящися о нас.

Радуйтесь, трие святителие, велицыи и вселенстии учителяе.

Кондак 7

Хотя змий лукавый искусити тя, якоже Иова многострадальнаго, воздвиже бурю злобы нечестивых, изгнавших тя в заточение. Обаче благодатию Христовою укрепляем, всякая злострадания и болезни добре претерпел еси,

отче Иоанне Златоусте, и блаженныя кончины сподобился еси. Ныне же пребывая в невечернем дни Царствия Христова, не престай молиться за ны у Престола Триипостаснаго Бога, да со умилением вопием: Аллилуиа.

Икос 7

Новии светильницы светозарнии и Церкви непоколебимии столпи явистесь, святителие велицыи: святостию бо жития вашего, еще во плоти суще на земли, бесте яко безплотни. Сего ради Церковь Христова, присно прославляючи вас, благодарственная пения восписует светодавцу Христу Богу, Егоже благодатию укрепляеми, велия болезни претерпесте и труды понесосте во благовестии Христове. Темже прославляюще Христа, непрестанно благодееющаго Церкви Своей Святей, восхваляем и вас, яко верных слуг Христовых и строителей Таин Божиих, вопиюще сицевая:

Радуйтеся, вернии Троицы поборницы;
радуйтеся, Православия непобедимии
исповедницы.

Радуйтеся, иерархов священноначальницы;

радуйтесь, лучами богословия вашего ересей
неистовство разрушившии.

Радуйтесь, пресветлии благочестия образи;
радуйтесь, верныя в боговедении
утвердившии.

Радуйтесь, слова Божия богодухновеннии
изъяснителие;

радуйтесь, Владыки Христа раби блазии и
вернии.

Радуйтесь, кротость Моисееву и ревность
Илиину в подвизех своих воплотившии;

радуйтесь, терпением скорбей и гонений
древнему Иову подражавшии.

Радуйтесь, Иосифа целомудрием и чистотою
украшеннии;

радуйтесь, Петрово исповедание и Иоанново
богословие показавшии.

Радуйтесь, трие святителие, велицыи и
вселенстии учителяе.

Кондак 8

Странное чудо благодати дарованныя тебе,
святителю Василие, уведи на себе Ефрем
Сирианин, егда восхотевшу ему видети тя, отче,

послал еси архидиакона своего привести его к тебе, и молитвою твоею Ефрем уразуме язык еллинский и, чудеси дивяся, прослави Бога, поя Ему: Аллилуиа.

Икос 8

Всю веру во Святую Троицу непорочну сохранисте и многи ко Христу приведосте, святителие Христовы, подвигом добрым подвизавшесе. Сего ради, взирающе на дивный подвиг ваш и на чистое житие ваше, со умилением вопием вам таковая:

Радуйтесь, Православия одеждою, свыше истканною, Церковь украсившии;

радуйтесь, еретическая суесловия ясно обличившии.

Радуйтесь, писаньми и словесы вашими духовное сокровище Церкви Христове собравшии;

радуйтесь, мудрость земную и вся красная мира Христа ради отвергшии.

Радуйтесь, сокровищ Небесных паче всего взыскавшии;

радуйтесь, Пастыреначальника Христа, яко
служителие вернии, живоносным стопам
последовавшии.

Радуйтесь, высокий образ добродетелей в
житии вашем явившии;

радуйтесь, душевныя страсти, вкупе же и
телесныя, духовным мечем посекшии.

Радуйтесь, Живоначальной Троице в жертву
живу, святу и благоугодну себе самих
принесшии;

радуйтесь, грешников предстателие.

Радуйтесь, нищих заступницы;

радуйтесь, пастырей учителяе и образы.

Радуйтесь, трие святителие, велицыи и
вселенстии учителяе.

Кондак 9

Всею душею твоею возлюбив Бога, отче
Григорие, боговидную чистоту и целомудрие
паче всех избрал еси и богослов великий и
таинник явился еси. Ныне предстоя Престолу
Святыя Троицы, испроси миру мир, и
спасение всем нам, восхваляющим тя и поющим
Богу: Аллилуиа.

Икос 9

Витийством богодухновенным триех
вселенских святителей еретичестии соблазны
престаша, православная же вера паче и паче
превозможе. Сего ради от усердия нашего со
умилением и любовью взываем к ним таковая:

Радуйтесь, любовью Православия все житие
ваше озарившии;

радуйтесь, Единого Бога в Триех Лицах
чувствовати научившии.

Радуйтесь, Ариево злочестие и хуления иных
еретиков низложившии;

радуйтесь, лжеучителей пребеззаконная уста
светлостью словес ваших заградившии.

Радуйтесь, небесныя трубы, проповедавшия
мирови Христово Евангелие;

радуйтесь, во иерарсех светила три великая.

Радуйтесь, учителяе кротости, воздержания,
вкупе же и покаяния;

радуйтесь, монашествующих добрии
учителяе и наставницы.

Радуйтесь, Церкви ограждение и
Православия поборницы;

радуйтеся, в труды Апостолов вшедшии и клас добраго исповедания пожавшии.

Радуйтеся, за веру и подвиги венцы нетленные от Пастыреначальника Христа приемшии;

радуйтеся, великия труды и подвиги во благоустроении Церкви Христовы подъемшии.

Радуйтеся, трие святителие, велицыи и вселенстии учителяе.

Кондак 10

Спаса Христа умоляти не престай о чтущих память твою, всехвальне Иоанне Златоусте: тебе бо дадеся благодать молитися за ны. Темже и мы, яко ко благоуханнаго мира сосуду, точащему исцеления всем с верою притекающим, со умилением и любовью припадающе, вопием прославльшему тя Богу: Аллилуиа.

Икос 10

Стена есте неборимая празднующим святую память вашу и всем притекающим к молитвенному покрову вашему, непостыдная надежда и крепкое заступление. Темже и нам, святии трие святителие, со умилением припадающим к вам, испросите у Престола

Святая Троица милость и благодать во благовременную помощь, да с радостию и благодарением взываем вам:

Радуйтесь, милость и утешение всем верным являющие;

радуйтесь, кающиеся грешники от сетей диавола избавляющие.

Радуйтесь, благодатных даров усерднии раздаятелие;

радуйтесь, всех человек предстательство и покрове.

Радуйтесь, сирых отцы и вдов заступницы;

радуйтесь, убогих богатство и болящих исцеление.

Радуйтесь, милосердия ко страждущим немолчнии проповедницы и юных наставницы;

радуйтесь, старец питателие.

Радуйтесь, сущих в скорбех утешителие;

радуйтесь, странных сопутницы.

Радуйтесь, изнемогающим поможение;

радуйтесь, чтущим память вашу радость и спасение низпосылающие.

Радуйтеся, трие святителие, велицьи и вселенстии учителяе.

Кондак 11

Пение Пресвятей Троице паче иных принесли есте, святителие Божии, умом, словом, делом и богословным витийством вашим сплетения риторская разрушили есте, наставляюще ны почитати Троицу во Единице и воспевати Ей: Аллилуиа.

Икос 11

Светозарную троицу святых иерархов, Василиа, царствия тезоименитаго, Григориа, Богослова наименованнаго, Иоанна, Златоустаго учителя вселенныя, глубины Божия испытавших, восхваляюще и светлую память их благоговейно торжествующе, похвальная пения приносим таковая:

Радуйтеся, благознаменитыя трубы Божественных глаголов;

радуйтеся, цевницы богодухновенныя.

Радуйтеся, апостольских писаний богодухновеннии изъяснителие;

радуйтесь, апостольских преданий ревнителие.

Радуйтесь, дивная величия Божия всем земнородным поведаяущи;

радуйтесь, Славу Божию вашим житием и словом проповедавшии всей вселенней.

Радуйтесь, ко спасению добрии путеводителие и наставницы;

радуйтесь, растленных обычаев искоренителие, благих же нравов насадителие.

Радуйтесь, отрицатися плотских похотей и страстей научающи;

радуйтесь, врачеве премудрии недугов душевных и телесных.

Радуйтесь, церковная светила, от Трисолнечнаго Света возжженная;

радуйтесь, цветы благовоннии райскаго прозябения.

Радуйтесь, трие святителие, велицыи и вселенстии учителяе.

Кондак 12

Благодать Божия обильно излися во устах ваших, треблаженнии: вера православная вами

укрепись, и мгла еретических шатаний и лжеучений светом ваших богодухновенных писаний отгнася. Темже, святителие, молитесь ко Христу Богу, да дух ревности вашае о вере и благочестии почиет и на нас, да сподобимся купно с вами пети Святей Троице: Аллилуиа.

Икос 12

Поюще и светло празднующе священную память вашу, преблаженнии Василие Великий, Богослове Григорие и Златоустый Иоанне, смиренно молим вас, не престайте молиться Христу о всех, верою призывающих вас и с любовью вопиющих таковая:

Радуйтесь, православных догматов хранителие;

радуйтесь, богословия живоноснии источницы.

Радуйтесь, верных сердца Божественне веселящии;

радуйтесь, яко неослабными подвиги вашими Арий низложися.

Радуйтесь, яко огнем богодухновенных вещаний ваших Евномиева ересь попалися;

радуйтеся, яко вашими богодухновенными глаголы Савеллиа ересь отгнася.

Радуйтеся, яко мудрование Нестора вами упразднися;

радуйтеся, о мире молитвенницы изряднейшии.

Радуйтеся, к Царствию Небесному верныя возводящи;

радуйтеся, Божии гласи, пречудно нам возгремевшии.

Радуйтеся, пастырей Церкви достоподражательнии образи;

радуйтеся, по Апостолу всем вся бывшии.

Радуйтеся, трие святителие, велицыи и вселенстии учителяе.

Кондак 13

О святителие Христовы и отцы треблаженнии, Василие Великий, церковное светило и столпе непоколебимый, Богослове Григорие, уме богопросвещенный, архиерею превеликий, вкупе же и Златоусте Иоанне, покаяния твердый проповедниче, небесным спребывающе ликом и ангельским

совокупльшесе силам, нынешнее приемше малое моление наше, испросите нам у Всецедраго Бога вышня мяслити и деяти, да вечныя муки избегше, небесную жизнь наследим с вами, вопиюще Богу: Аллилуиа.

Этот кондак читается трижды, затем 1-й икос «Ангели земнии...» и 1-й кондак «Избраннии светильницы...».

Молитва

О пресветлии светильницы Церкви Христовы, Василие, Григорие и Иоанне, светом православных догматов вся концы земли озарившии и мечем слова Божия хульных смущения и шатания ересей угасившии; припадающе к вашему милосердию, с верою и любовью из глубины души вопием: предстояще Престолу Пресвятыя, Единосущныя, Животворящия и Нераздельныя Троицы, за Нюже словом, писанием и житием добре подвизастесе и души своя полагаете, всегда молитесь Ей, да укрепит и ны в Православии и единомыслии, и непоколебимем даже до смерти исповедании веры Христовы, и во вседушевнем послушании его Церкви Святей: да препояшет ны с высоты силою на вся невидимыя и

видимыя враги наша: да соблюдет Церковь Свою незыблему от неверия, суеверия, ересей и раскола; да дарует архипастырем нашим здравие, долгоденствие и во всем благое поспешение; пастырем нашим да подаст духовное трезвение и ревность о спасении пасомых; правителем суд и правду, воином терпение, мужество и одоление на враги, сирым и вдовицам заступление, болящим исцеление, юным благое в вере возрастание, старцем утешение, обидимым заступление, и всем вся ко временней и вечней жизни потребная, яко да в мире и покаянии, желанием спасения горяще, Господеви работающе, добрым подвигом подвизающесе, течение наше скончаем и сподобимся в Небеснем Царствии купно с вами всегда пети и славити пресвятое и великолепое имя Отца, и Сына и Святаго Духа во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**